

## Der Cometen vnd anderer fiew- riger erscheinung im Luft vrsach.

**D**er Natürlich maister Aristotiles / ym Büch von den  
erscheinungen in der höch / spricht / das dise vntre welt /  
müß den obern vmbschweyssen oder vmbblausen an-  
rührig sein / Von welchen alle yre kröfft geregirt werdenn / Der  
gleichen spricht auch Ptholo. in seinen treffentlichen Hundert  
sprüchen / das diser vntern welt angesicht / den hymnischen an-  
gesichten vnter worffen sein / Als der yrrdisch vnder dem hymn-  
ischenn / Der gleichenn der yrrdisch Styer / dem hymnischenn  
Styer zē. vnterworffen sein.

So spricht auch Plato dz die vnterthanen / oder vnterworf-  
fen / den herrschenden / die vntern den obern nach dem gesatz der  
natur sein weichen / vnd gehorsam laysten / Dienen auch der  
selbigen gepictung / dan die gleichen mit den gleichen / vnd eyn-  
helligen oder eyngestältigen leicht über ein kumenn / Auß disen  
sprüchen der natürlichen maistern / vnd andern augenschein-  
lichen sachen / die täglich fürkommen ist allen menschen (welch  
anders ein vernunft habē) genügsam wissen vñ offenbar / das  
alle natürliche sachen / inn diser vntern zerrüttlichen (auß den  
Vier Elementen gemacht) welt / yr vrsach haben vnd regiert  
werden / Durch die manigfaltigen vnd wunderbarlichen bewe-  
gung der Planeten / vnter in selbs / vnd mit den festen stern / ge-  
rings vmb die Vier Element / mit yrn zusamenfügung vnd  
Aspecten / die sy vntereinander an vnterlaß haben / Vnd also  
durch yr stäte verendrung / die Vier Element / vnd alles was  
auß in vnd in ynen ist / Auch für vnd für verendert in solcher  
gestalt dz etlich ding werden gepert / etlich nemen auff / etlich wy-  
der ab / etlich werden zerüt / vñ darnach wider in ein anders ver-  
endert / dz kain natürlichē dings in diser vntern welt wesen stet  
oder fest / kan noch mag pleyben / als lanng dise vntre welt / auß